



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr.207, Datë 08.10.2021

MBI

**SHQYRTIMIN E KËRKESËS SË SHOQËRISË VOLTALIA S.A. DHE OST SH.A., PËR
VLERËSIMIN DHE PRANIMIN E DISA NDRYSHIMEVE NË MARRËVESHJEN
STANDARDE TË LIDHJES TË MIRATUAR ME VENDIMIN E BORDIT TË ERE-S
NR. 87, DATE 20.4.2018**

Në mbështetje të nenit 16 dhe nenit 20, pika “h”, të ligjit nr. 43/2015, “Për sektorin e energjisë elektrike”, i ndryshuar; nenit 15, të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr.96, datë 03.09.2016, bordi i ERE-s në mbledhjen e tij të datës 08.10.2021, mbasi shqyrtoi relacionin e përgatitur me nr. 129/5 prot., datë 06.10.2021 nga Drejtoritë Teknike, “Mbi shqyrtimin e kërkesës së shoqërisë Voltalia s.a. dhe OST sh.a. “Për vlerësimin dhe pranimin e disa ndryshimeve në marrëveshjen standarde të lidhjes të miratuar me vendimin e bordit të ERE-s nr.87, datë 20.04.2018”,

Konstatoi se:

- Shoqëria “Voltalia” S.A., nëpërmjet shkresës së protokolluar në ERE me nr. 745/6 prot., datë 11.06.2021, ka paraqitur kërkesën për vlerësimin dhe pranimin e disa ndryshimeve në Marrëveshjen standarde të lidhjes të miratuar me vendimin e bordit të komisionerëve të ERE-s nr. 87, datë 20.4.2018 “Mbi miratimin e rregullores së procedurave për lidhjet e reja dhe modifikimin e lidhjeve ekzistuese me rrjetin e transmetimit; marrëveshjes së operimit në rrjetin e transmetimit ndërmjet OST sh.a. dhe përdoruesit, si dhe marrëveshjes së lidhjes në rrjetin e transmetimit ndërmjet OST sh.a. dhe përdoruesit”.
- ERE nëpërmjet shkresës nr. 745/3 prot., datë 23.06.2021, dërguar OST sh.a., i ka kërkuar OST sh.a., të shprehë qëndrimin e saj lidhur me propozimet e kërkuara përpara shqyrtimit të kërkesës nga ana e jonë.
- Shoqëritë “Voltalia” s.a., dhe “OST” sh.a. nëpërmjet shkresës së përbashkët të protokolluar në ERE me nr. 745/6 prot., datë 13.09.2021, kanë paraqitur marrëveshjen e lidhjes të rakorduar nga palët duke parashtruar se: *palët kanë rënë dakord për kushtet dhe afatet e marrëveshjes së lidhjes.*
- Palët kanë bërë me dije se marrëveshja e propozuar ndryshon nga modeli i Marrëveshjes së Lidhjes të miratuar me vendimin e bordit të komisionerëve të

ERE-s nr. 87, datë 20.4.2018 “Mbi miratimin e rregullores së procedurave për lidhjet e reja dhe modifikimin e lidhjeve ekzistuese me rrjetin e transmetimit; marrëveshjes së operimit në rrjetin e transmetimit ndërmjet OST sh.a. dhe përdoruesit, si dhe marrëveshjes së lidhjes në rrjetin e transmetimit ndërmjet OST sh.a. dhe përdoruesit”.

- Në momentin e miratimit të Marrëveshjes së lidhjes në Rrjetin e Transmetimit ndërmjet OST sh.a. dhe Përdoruesit, nuk ka pasur asnjë impiant fotovoltaik të lidhur apo kërkesë për lidhje nga impiante të tillë, me sistemin e transmetimit të enegjisë elektrike. Kjo evidentohet dhe në faktin se në marrëveshjen e miratuar me vendimin e bordit të ERE-s nr. 87, datë 20.04.2018, në nenin 1 “Anekset dhe përkufizimet”, jepet përkufizimi i termit Impiant si vijon: *“Impiant” “(në rastin e marrëveshjeve të lidhjes me impiant gjenerimi) nënkupton, hidrocentralin __ që do të ndërtohet nga Përdoruesi”*.
- Impiantet gjeneruese të enegjisë elektrike kanë karakteristikat e tyre, në këtë kontekst edhe impiantet Fotovoltaike të gjenerimit të energjisë elektrike kanë veçoritë e tyre dhe ndryshojnë nga impiantet Hidrike (Hidrocentralet). Për rrjedhojë marrja në konsideratë e këtyre karakteristikave edhe në marrëveshjet përkatëse përfshi edhe Marrëveshjen e lidhjes në Rrjet është e domosdoshme. Siguria e operimit të rrjetit është një element që duhet të merret në konsideratë në planifikimin dhe zhvillimin e rrjetit të transmetimit, në rastet e lidhjes së impianteve fotovoltaike me sisteme konvertimi, elementë që janë marrë parasysh në përpilimin e kësaj marrëveshje.
- Shoqëria Voltalia S.A., dhe OST sh.a., nëpërmjet shkresës së përbashkët të protokolluar në ERE me nr. 745 prot., datë 11.06.2021, deklaron se palët kanë rënë dakort që, Karavasta Solar sh.p.k. do të kryejë punimet, me kostot e veta, për ndërtimin e një linje transmetimi 220 kV, përfshirë traktin përkatës 220 kV në nënstacionin Fier, për lidhjen e centralit Fotovoltaik me Rrjetin e Transmetimit të OST-së.
- Ky përcaktim është në përputhje me Rregulloren e Procedurave për Lidhjet e Reja dhe Modifikimin e Lidhjeve Ekzistuese me Rrjetin e Transmetimit të miratuar me vendimin e bordit të ERE-s nr. 87, datë 20.04.2018, në pikën 4.5.1, të kësaj rregullore është e sanksionuar qartë se: *“Në të gjitha rastet kostot për lidhjen ose modifikimin e saj me rrjetin e transmetimit përballohen nga aplikuesi”*.
- Në të njëjtën kohë në nenin 10, pika 2, e ligjit nr. 43/2015 “Për Sektorin e Energjisë Elektrike” i ndryshuar, përcaktohet se: *ERE bashkëpunon me Ministrinë përgjegjëse për energjinë dhe me institucionet e tjera publike, për sa u takon çështjeve objekt të këtij ligji që janë në fushën e përgjegjësisë së tyre.*
- Nisur nga gjithë sa parashtuar më sipër vlerësohet se është e rëndësishme që të krijohen kushtet e nevojshme për zhvillimin dhe diversifikimin e burimeve të rinovueshme të energjisë edhe në aspektin e marrëveshjeve që mundësojnë lidhjen me rrjetin dhe sigurinë e operimit të rrjetit dhe të impianteve gjeneruese që reflektojnë karakteristikat dhe veçoritë e tyre, me qëllim përmbushjen e detyrimeve ligjore dhe për burimet gjeneruese fotovoltaike.

- Neni 20, pika (h), e ligjit nr. 43/2015 “Për sektorin e energjisë”, të ndryshuar, përcakton se: ERE “*Miraton kontratën tip ose kushtet e përgjithshme të kontratave për shërbimet e rregulluara, të ofruara nga pjesëmarrësit e tregut, të ngarkuar me detyrimin e shërbimit publik*”.
- Në këto rrethana marrëveshja duhet të shërbejë si një marrëveshje që përcakton kushtet e përgjithshme duke marrë në konsideratë sa parashtruar nga Ministria e Energjisë dhe Industrisë me shkresën nr. 5038/1 prot., datë 12.07.2021, respektivisht:
 - (I) Projekti të jetë zgjedhur bazuar në një proces konkurrimi;
 - (II) Fuqia e Instaluar e Impiantit të jetë nga 100 MW e lartë;
 - (III) Çmimi i nxjerrë nga procesi konkurrues është nën 30 Eur/MWh.

Për gjithë sa më sipër, bordi i ERE-s,

Vendosi:

1. Miratimin e Marrëveshjes së lidhjes me rrjetin e transmetimit ndërmjet Operatorit të Sistemit të Transmetimit OST sh.a. dhe “Voltalia” s.a. përcjellë me shkresën me nr. 5430 prot., dt. 13.09.2021 të OST sh.a. (Bashkëlidhur)
2. Marrëveshja e lidhjes shërben për Projektet që plotësojnë kushtet e mëposhtme:
 - (i) Janë zgjedhur bazuar në një proces konkurrimi;
 - (ii) Fuqia e Instaluar është nga 100 MW e lartë;
 - (iii) Çmimi i shitblerjes së energjise elektrike që rezulton nga procesi konkurrues është nën 30 Eur/MWh.
3. Kjo marrëveshje ndërmjet “Voltalia” s.a. dhe OST sh.a. është e vlefshme për sa kohë që respektohen kushtet e mësipërme.
4. Të ngarkohet OST sh.a. në cilësinë e të licencuarit për të hartuar Marrëveshjen e lidhjes në rrjetin e transmetimit ndërmjet OST sh.a. dhe Përdoruesit për projekte të ngjashme.
5. Drejtoria Juridike dhe e Zgjidhjes së Mosmarrëveshjeve të njoftojë subjektet e interesuara për vendimin e bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI

**MARRËVESHJA E LIDHJES ME
RRJETIN E TRANSMETIMIT
NDËRMJET OPERATORIT TË
SISTEMIT TË TRANSMETIMIT OST
SHA DHE PËRDORUESIT**

____.____.____

Kjo Marrëveshje e lidhjes (Marrëveshja) lidhet sot, në datën _____.20____ ndërmjet:

1. Operatori i Sistemit të Transmetimit (më poshtë referuar si OST sh.a.), shoqëri aksionare, regjistruar si person juridik me vendimin nr. 31935, datë 14.7.2004, të Gjykatës së Rrethit Gjyqësor Tiranë, me seli në Tiranë, _____, me NIPT K42101801N, përfaqësuar nga z. _____, **administratori i OST sh.a.**,

dhe

2. Shoqërisë _____, një shoqëri e krijuar sipas ligjeve të Republikës së Shqipërisë, regjistruar si person juridik me vendimin nr. _____, datë _____, të Gjykatës së Rrethit Gjyqësor Tiranë, me seli në Tiranë, me NIPT _____, me seli të regjistruar në adresën: _____, e përfaqësuar nga përfaqësuesi ligjor z/znj. _____ (këtu më poshtë referuar si **“Përdoruesi”** ose **“Shoqëria”**),

secila referuar sipas marrëveshjes, gjithashtu, si **“Pala”** ose së bashku **“Palët”**, sipas rastit.

Meqenëse:

A. Me shkresën nr. _____ prot., datë _____, shoqëria _____ ka paraqitur në OST sh.a. kërkesën për lidhje me rrjetin e transmetimit të OST sh.a., të një _____ (Impiantit), me fuqi _____, të vendosur në _____.

B. Me shkresën nr. _____ prot., datë _____, të OST sh.a., shoqërisë _____ iu dha oferta e lidhjes për të lidhur në rrjetin e transmetimit të OST

sh.a., të _____, sipas skemës principale elektrike të lidhjes së _____, me sistemin e transmetimit të aprovuar (aneksi 1).

C. (Përshkrim i përmbledhur i skemës së lidhjes.)

D. Me shkresën nr. _____ prot., datë _____, **“Deklaratë pranimi”**, Shoqëria _____ ka informuar OST sh.a. për pranimin e ofertës së lidhjes së _____, nëpërmjet skemës _____ (aneksi 1).

E. OST sh.a. dhe Shoqërisë i kërkohet që sipas Kodit të Rrjetit (siç përshkruhet më poshtë) të hyjë në marrëveshje për lidhjen e _____, me rrjetin e transmetimit, sipas skemës principale elektrike të aprovuar.

F. Shoqëria është pajisur/në proces për t’u pajisur me licencë për (prodhimin e energjisë elektrike/tjetër) nga ERE, miratuar me vendimin e ERE-s nr. _____, datë _____, që i bashkëngjitet kësaj marrëveshjeje si aneks nr. 2., me pajisjen me këtë licencë, shoqëria do të dorëzojë pranë OST-së kopje të kësaj licence që do t’i bashkëngjitet kësaj Marrëveshjeje.

G. Shoqëria pranon se parashikimet e përcaktuara në këtë marrëveshje janë subjekt dhe rregullohen nga Kodi i Rrjetit të Transmetimit dhe anekset e tij, **“Rregullorja e procedurave për lidhjet e reja dhe modifikimin e lidhjeve ekzistuese me rrjetin e transmetimit”**, si dhe aktet e tjera dalë në zbatim të tyre, dhe i deklaron për të njohura dhe të pranuar pa asnjë kusht ose rezervë.

Palët bien dakord sa më poshtë:

Neni 1

Anekset dhe përkufizimet

1. Të gjitha parashikimet dhe anekset përbëjnë pjesë integrale të kësaj Marrëveshjeje.

2. Me anekse do të kuptojmë:

a) Aneksi nr. 1. Dokumentacioni teknik i lidhjes me rrjetin kombëtar të transmetimit

b) Aneksi nr. 2. Licenca për prodhimin e energjisë elektrike, e lëshuar nga ERE ose Aplikimi pranë ERE për t'u pajisur me licencë për prodhimin e energjisë elektrike.

c) Aneksi nr. 3. Specifikimet teknike të sistemit të matjes tregtare

d) Aneksi nr. 4. Specifikimet teknike të lidhjes me sistemin e telekomunikacionit

e) Aneksinr. 5. Specifikimet teknike të lidhjes me sistemin SCADA të Qendrës Kombëtare Dispeçer

f) Aneksi nr. 6. Deklaratat e përgjegjësisë dhe gatishmërisë

g) Aneksi nr. 7. Pjesët e aseteve të lidhjes që do të dorëzohen

h) Në rast konflikti, ndërmjet përcaktimeve të bëra në anekset e kësaj Marrëveshje dhe dispozitave të mëposhtme, këto të fundit do të mbizotërojnë.

3. Në këtë Marrëveshje (përfshirë anekset e saj), përveç kur konteksti e kërkon ndryshe, termat e mëposhtëm do të nënkuptojnë si vijon dhe përveç këtyre përcaktimeve çdo term tjetër i përdorur në këtë marrëveshje ka të njëjtin kuptim me përkufizimet e termave të dhënë në ligjin nr. 43/2015, "Për sektorin e energjisë elektrike".

"**Akt**" nënkupton çdo ligj, vendim të Këshillit të Ministrave, udhëzim të ministrive ose të organeve publike rregullatore ose jo, të veshura me kompetenca për të nxjerrë akte me qëllim rregullimin e një fushe të caktuar, të cilat kanë efekt mbi veprimtarinë e palëve dhe veçanërisht mbi fushën objekt të kësaj marrëveshje.

"**Energjia e Prodhuar**" nënkupton energjinë elektrike të injektuar në Rrjetin e Transmetimit të OST sh.a. në Pikën e Matjes siç matet në përputhje me Kodin e Matjes dhe me këtë Marrëveshje të Lidhjes.

"**Marrëveshje**" nënkupton këtë marrëveshje të lidhur midis Përdoruesit dhe OST-së me qëllim përcaktimin e kushteve për lidhjen dhe përdorimin e rrjetit kombëtar të transmetimit të energjisë elektrike nga Përdoruesi.

"**Ngjarje e Ndërprerjes**" nënkupton çdo ndërprerje në Rrjetin e Transmetimit ose de-energizim të impiantit që nuk lejon Përdoruesin të injektojë Energjinë Elektrike plotësisht ose pjesërisht në Pikën e Lidhjes që është rezultati i çdo sjelljeje me dashje ose nga pakujdesia të OST sh.a. apo shkeljeje nga OST sh.a. të ndonjë dispozite të ligjit të zbatueshëm, Kodit të Rrjetit ose kësaj Marrëveshjeje.

"**Përdorues**", nënkupton çdo person fizik ose person juridik që janë të lidhur me Rrjetin e Transmetimit dhe që operojnë njësi gjeneruese, ngarkesa apo rrjete shpërndarje te energjise elektrike.

"**Objekti**", nënkupton impiant gjenerimi ose ngarkese.

"**Impiant**" [në rastin e marrëveshjeve të lidhjes me impiant gjenerimi] nënkupton, Impiantin Fotovoltaik _____ që do të ndërtohet nga Përdoruesi.

"**Asetet e lidhjes**" nënkupton asetet e lidhjes (linja, nënstacioni, elemente të tjera lidhëse) që do të ndërtohen nga Përdoruesi, për të lidhur centralin prodhues/konsumator të energjisë elektrike me rrjetin e transmetimit, siç është paraqitur në aneksin nr. 1.

"**Nënstacion**" nënkupton nënstacionin TL/TM që do të ndërtohet nga Përdoruesi.

"**Pika e lidhjes**" nënkupton pikën ku objektet lidhen me rrjetin e transmetimit, që përcakton vendin e saktë të lidhjes me rrjetin e transmetimit (hyrje-dalje në linjë, lidhje në zbara etj.)

"**Pika e matjes**" nënkupton pikën ku matet energjia elektrike që Përdoruesi injekton në/merr nga rrjeti i transmetimit që është i instaluar në anën e tensionit të lartë të transformatorit të fuqisë.

"**Komisionim**" nënkupton procesin e testimit, kontrollit dhe kolaudimit të aseteve të lidhjes (nënstacionit TL/TM dhe pjesës së linjës lidhëse), për të plotësuar kushtet dhe përcaktimet e parashtruara nga Kodi i Rrjetit të Transmetimit.

“**Licenca**” nënkupton në çdo kohë, dokumentin zyrtar për licencimin e një subjekti dhe veprimtarinë e saj sipas ligjit të zbatueshëm.

“**Kodi i Rrjetit**” nënkupton Kodin e Rrjetit të Transmetimit të miratuar nga ERE, që është tërësia e rregullave teknike, të cilat rregullojnë operimin e sistemit të transmetimit, si dhe përcaktojnë kushtet e shërbimit që ofrohen nga Operatori i Sistemit të Transmetimit ndaj përdoruesve të sistemit të transmetimit, në përputhje me rregullat e ENTSO-E.

“**Rregullator**” nënkupton Entin Rregullator të Energjisë (ERE).

“**Rrjeti i Transmetimit**” nënkupton rrjetin kombëtar të transmetimit të energjisë elektrike siç përcaktohet në Kodin e Rrjetit të Transmetimit.

“**Ndryshim në kontroll**” nënkupton çdo shitje, kalim, transferim, ndërprerje, qira, tjetërsim, dhurim, dorëheqje, shkëmbim ose ndonjë heqje tjetër dore nga kontrolli.

“**Punimet**” nënkupton punën që do të kryhet nga Përdoruesi ose kontraktori i tij për të realizuar lidhjen në rrjetin e transmetimit.

“**Ndërprerje të programuara të detyruara**” nënkupton çdo ndërprerje të detyruar nga rrethana siç përcaktohen në këtë marrëveshje, të kërkuar nga OST-ja, në përputhje me këtë marrëveshje dhe që amendon ndërprerjet e planifikuara në Rrjetin e Transmetimit.

“**Ditë Pune**” nënkupton të gjitha ditët e javës, përveç të shtunës, të dielës dhe çdo dite pushimi zyrtar në Republikën e Shqipërisë.

“**Qendra Operative e Përdoruesit**” nënkupton njësinë organizative të Përdoruesit me aftësitë e nevojshme teknike, e cila është ndërfaqja direkte ndërmjet objektit të Përdoruesit dhe OST/Qendrës Kombëtare Dispeçer.

Neni 2 Objekti

Objekti i Marrëveshjes është përcaktimi i termave dhe kushteve për lidhjen në Rrjetin e Transmetimit të OST sh.a., të _____ (objekti plotësohet me përshkrim përkatës), të shoqërisë _____, sipas skemës _____ (aneksi 1).

Neni 3 Kohëzgjatja e Marrëveshjes

1. Kjo Marrëveshje lidhet për një kohëzgjatje të pacaktuar, përveç rasteve të zgjidhjes së marrëveshjes sipas nenit 18.

2. Në rastin kur Përdoruesi synon ta përfundojë këtë Marrëveshje, duhet të bëjë të ditur qëllimin e tij, duke njoftuar OST sh.a. me anë të njoftimit të regjistruar të paktën 6 (gjashtë) muaj përpara.

3. Në rastin kur OST synon të përfundojë këtë marrëveshje, njofton së paku 6 (gjashtë) muaj përpara Ministrinë Përgjegjëse për Energjinë.

4. Zgjidhja e Marrëveshjes sjell shkëputjen fizike të pikës së lidhjes (*sipas projektit për lidhjen*).

Neni 4 Deklarime dhe garanci të Përdoruesit

Përdoruesi deklaron dhe garanton OST sh.a., se:

1. Përdoruesi është themeluar në përputhje me legjislacionin shqiptar, i regjistruar pranë Regjistrat Tregtar dhe nuk është subjekt i asnjë procedure likuidimi dhe/ose falimentimi.

2. Përdoruesi zotëron ose do të marrë të gjitha autorizimet e nevojshme me qëllim zbatimin e punimeve që lidhen me ndërtimin, komisionimin dhe vënien në punë të objektit dhe asetëve të lidhjes.

3. Përdoruesi disponon ose do të marrë të gjitha mjetet, financiare, teknike dhe teknologjike me qëllim realizimin e projektit që lidhet me ndërtimin e objektit, asetëve të

lidhjes dhe të të gjitha veprimtarive të tjera që lidhen me mirëmbajtjen dhe shfrytëzimin në punë nga vetë Përdoruesi. Shpenzimet për mirëmbajtjen dhe shfrytëzimin e aseteve të lidhjes janë në ngarkim të shoqërisë dhe përcaktohen në marrëveshjen e mirëmbajtjes që do të lidhet midis OST sh.a. dhe shoqërisë, pas nënshkrimit të Marrëveshjes së operimit.

4. Përdoruesi do të zbatojë me përpikëri të gjitha procedurat dhe rregullat e zbatueshme në përputhje me Kodin e Rrjetit të Transmetimit dhe legjislacionit shqiptar në përgjithësi për ndërtimin dhe vënien në punë të objektit dhe aseteve të lidhjes.

5. Lidhja dhe zbatimi i kësaj marrëveshjeje nga ana e Përdoruesit nuk përbën asnjë shkelje të ligjit në fuqi në Shqipëri, dokumenteve statutove të shoqërisë dhe çdo kontrate ose marrëveshjeje në të cilën përdoruesi është palë.

6. Shoqëria do t'i garantojë dhe do t'i sigurojë OST sh.a., përgjatë gjithë kohëzgjatjes së kësaj marrëveshjeje, të drejtën e kalimit për të hyrë dhe për të kryer punime në nënstacionin lidhës me rrjetin e transmetimit të Përdoruesit, si dhe në sipërfaqet e tokës ku kalon traseja e linjës lidhëse.

7. Shoqëria do t'i kalojë OST sh.a. në pronësi asetet e lidhjes me rrjetin e transmetimit dhe do t'i garantojë dhe sigurojë OST sh.a., gëzimin e qetë, për të përdorur dhe gëzuar pronën e kaluar me anë të një kontratë dhurimi. Në këtë rast, pika 3 e këtij neni nuk do të zbatohet për pjesën që lidhet me shpenzimet e mirëmbajtjes dhe të shfrytëzimit të aseteve të lidhjes.

Neni 5

Deklarime dhe garanci të OST sh.a.

OST sh.a. deklaron dhe garanton Përdoruesin se:

1. OST sh.a. është një person juridik publik, i cili vepron në përputhje me legjislacionin dhe të drejtën shqiptare.

2. OST sh.a. zotëron të gjitha mjetet teknike dhe teknologjike, si dhe personelin e kualifikuar dhe të përshtatshëm me qëllim zbatimin dhe përmbushjen e detyrimeve që rrjedhin nga kjo marrëveshje.

3. Lidhja dhe zbatimi i kësaj marrëveshjeje nga ana e OST sh.a. nuk përbën shkelje të ligjeve në fuqi në Shqipëri, të dokumenteve të krijimit të saj, si dhe të çdo kontrate apo marrëveshjeje ku OST sh.a. është palë.

Neni 6

Detyrimet e Përdoruesit

1. Përdoruesi ka projektuar dhe do të ndërtojë me shpenzimet e tij, objektin dhe asetet e lidhjes, që të sigurojë lidhjen e _____ (objekti plotësohet me përshkrim sipas projektit), me rrjetin _____ kV të transmetimit të OST sh.a.

2. Përdoruesi do të respektojë të gjitha specifikimet teknike në lidhje me telekomunikacionin, sistemin SCADA dhe matjen, pjesë të kësaj marrëveshjeje dhe të detajuara në anekset nr. 3, 4 dhe 5.

3. Përdoruesi do të përdorë për të ndërtuar asetet e lidhjes, teknologjinë bashkëkohore, si edhe të gjitha sistemet e sigurisë, në mbrojtje të rrjetit kombëtar të transmetimit të energjisë elektrike.

4. Përdoruesi do të kryejë të gjitha punimet në lidhje me ndërtimin e aseteve të lidhjes, në përputhje të plotë me projektin e paraqitur dhe miratuar nga OST sh.a.

5. Përdoruesi do të lejojë në çdo moment OST sh.a., punonjësit, nënkontraktorët dhe/ose personat e tretë të autorizuar prej saj, të hyjnë në zonën në pronësi të saj ku ndodhet nënstacioni dhe linja që po ndërtohen/janë ndërtuar, me qëllim inspektimin e punimeve të kryera dhe kryerjen e verifikimeve që kërkohen në përputhje me Kodin e Rrjetit të Transmetimit.

6. Përdoruesi garanton se me shpenzimet e tij do të ruajë të vlefshme përgjatë tërë

kohëzgjatjes së kësaj marrëveshjeje të gjitha autorizimet e nevojshme, me qëllim mirëfunksionimin e aseteve të lidhjes.

7. Në rast se Përdoruesi kërkon shkëputjen e lidhjes elektrike nga rrjeti i transmetimit, duhet të njoftojë OST sh.a., 6 muaj përpara dhe shoqëria është e detyruar të mbulojë të gjitha shpenzimet e nevojshme për shkëputje.

8. Përdoruesi garanton se me shpenzimet e tij do të marrë dhe ruajë të vlefshme përgjatë tërë kohëzgjatjes së kësaj Marrëveshjeje, të gjitha autorizimet e nevojshme me qëllim mirëfunksionimin e _____ (objekti) dhe aseteve të lidhjes.

9. Përdoruesi merr përsipër të mbajë në një gjendje eficiente _____ (objekti) që të mos shkaktojë dëmtim të Përdoruesit e tjerë, të përfshirë tashmë në rrjetin e transmetimit të OST sh.a.

10. Me kërkesë të OST sh.a. dhe në mënyrën e përcaktuar nga kjo e fundit, shoqëria, duke mbartur shpenzimet përkatëse, do të kryejë ndërhyrjet e nevojshme në _____, kur zhvillimet e rrjetit të transmetimit ose nevojat e rrjetit e bëjnë këtë të nevojshme për të garantuar sigurinë e sistemit elektroenergjetik shqiptar.

11. Shoqëria duhet të njoftojë menjëherë OST sh.a. për çdo ndryshim dhe/ose ngjarje në lidhje me karakteristikat teknike, menaxhimin, operimin dhe kontrollin e _____ (objekti) dhe, në përgjithësi, të respektojë detyrimet për informim në përputhje me parashikimet e Kodit të Rrjetit.

Neni 7

Dhënia e aksesit

1. Përdoruesi është i detyruar t'i japë akses të plotë OST sh.a, pa asnjë kundërshtim apo pretendim të çfarëdo lloji, që OST sh.a. të bëjë në të ardhmen zgjerimin e nënstacionit ngritës _____, në (plotësohet sipas rastit pika në rrjetin e transmetimit dhe detaje mbi mënyrën e zgjerimit), për nevoja të zhvillimit

të sistemit të transmetimit, në përputhje me Kodin e Rrjetit të Transmetimit. Për këtë qëllim, në sheshin e nënstacionit duhet parashikuar hapësira e lirë për zgjerimin e tij, sipas një planimetrie të aprovuar nga OST sh.a.

2. Autorizimet që do të jepen nga OST sh.a. për lidhjen e një pale të tretë nëpërmjet aseteve të lidhjes të realizuara nga shoqëria, do të jenë në respektim të nenit 28 të ligjit nr. 43/2015, "Për sektorin e energjisë elektrike" dhe "Rregullores së procedurave për lidhjet e reja dhe modifikimin e lidhjeve ekzistuese me rrjetin e transmetimit".

Neni 8

Detyrime të OST sh.a.

1. OST sh.a. duhet të:

a) Marrë përsipër planifikimet dhe detyrimet përkatëse.

b) Marrë në dorëzim pjesën e linjës _____, pjesa e linjës që do t'i dorëzohet dhe do t'i kalojë në pronësi OST-së, fillon të shtylla nr. _____ deri të shtylla nr. _____, përfshirë shtyllat, bazamentet dhe sipërfaqet e tokës së bazamenteve të shtyllave [i aplikueshëm kur ka dhurim].

c) Brenda një periudhe të arsyeshme nga momenti kur shoqëria ka përmbytur përcaktimet e bëra në nenin 9 dhe 11, si dhe me një njoftim me shkrim të saj, t'i sigurojë shoqërisë akses në rrjetin e transmetimit, për të mundësuar përfundimin e punimeve duke energjizuar nënstacionin _____.

Neni 9

Dorëzimi i pjesës së linjës [i aplikueshëm kur ka dhurim]

1. Kalimi i pronësisë së pjesës së linjës _____ që fillon nga shtylla nr. _____ deri të shtylla nr. _____ përfshirë shtyllat, bazamentet në të cilat janë ndërtuar shtyllat dhe sipërfaqet e tokës së bazamenteve të

shtyllave (sipërfaqja e katërkëndëshit që formojnë këmbët e shtyllës plus një metër për anë) do të bëhet menjëherë sapo kjo linjë të jetë përfunduar dhe të jetë gati për përdorim. Ky kalim mund të bëhet edhe më parë, në qoftë se e dikton vullneti i palëve, në çdo rast, kalimi i pronësisë duhet të bëhet përpara se pjesa e linjës dhe nënstacionin në fjalë të energjizohen.

2. Kalimi i pronësisë do të bëhet me kontratë dhurimi, ku shoqëria do të dhurojë dhe OST sh.a. do të pranojë pasuritë e parashikuara në pikën "1" të këtij neni.

Në aneksin 7, pjesë e kësaj marrëveshje, jepet planimetria në të cilën janë paraqitur pjesa e linjës _____, që përfshin shtyllat, bazamentet dhe linjën me gjatësi _____, që do t'i kalojë OST sh.a dhe vlera përkatëse e tyre.

Neni 10

Lidhja me sistemin SCADA, telekomunikacionin dhe komunikimi me Qendrën Kombëtare Dispeçer

1. Përdoruesit e lidhur në rrjetin e transmetimit do të transferojnë të dhënat në kohë reale drejt Qendrës Kombëtare Dispeçer, duke realizuar lidhjen e detyrueshme dhe telekomunikimin, duke përmbushur kërkesat e përcaktuara në aneksin nr. 4.

2. Shoqëria merr përsipër integrimin e të dhënave të nevojshme të nënstacionit të ri 110/10 kV për kontroll-monitorimin në sistemin SCADA të Qendrës Kombëtare Dispeçer. Të dhënat e nevojshme për t'u integruar duhet të jenë statuses e çelësave/thikave, alarmet dhe matjet (P, Q, U, I, F) për traktet 110 kV të linjave dhe transformatorëve të këtij nënstacioni, duke përmbushur kërkesat e përcaktuara në aneksin nr. 5.

3. Shoqëria merr përsipër të zbatojë të gjitha detyrimet që lindin nga Kodi i Transmetimit, Kodi i Lidhjes, të cilat

përfshijnë por jo vetëm, zbatimin e menjëhershëm të urdhrave të Qendrës Kombëtare Dispeçer, përveç rasteve kur ky veprim mund të rrezikojë sigurinë e personelit ose impiantit.

Neni 11

Testimi, komisionimi dhe energjizimi

1. Pas përfundimit të ndërtimit të aseteve të lidhjes dhe të _____(objektit), Përdoruesi do të njoftojë OST sh.a., për të organizuar një grup të përbashkët pune. Roli i OST sh.a. në këtë grup pune është të asistojë gjatë testimit dhe komisionimin të pajisjeve të instaluara, me qëllim lidhjen e centralit prodhues/konsumator, në përputhje me Kodin e Rrjetit të Transmetimit. Mosprezenca e stafit të OST sh.a. gjatë proceseve të testimit dhe komisionimit, i bën të pavlefshme rezultatet.

2. Për qëllimet e kryerjes së testimit dhe komisionimit të aseteve të lidhjes, Përdoruesi vë në dispozicion të OST sh.a të gjithë dokumentacionin teknik që lidhet me funksionimin e instalimeve të tilla. Ky dokumentacion duhet të jetë në gjuhën shqipe ose angleze.

3. OST sh.a., gjithashtu, mund t'i kërkojë Përdoruesit që me shpenzimet e tij, të bëjë punë shtesë të paparashikuara në marrëveshje, por të gjykuara të nevojshme për të verifikuar se asetet e lidhjes janë konform specifikimeve dhe kushteve të kësaj marrëveshjeje.

4. Përdoruesi është i detyruar të dorëzojë protokollet e plota të kontrollit dhe testimit të pajisjeve, të kryera në prani të specialistëve të OST sh.a. dhe të firmosura prej tyre, si dhe të dorëzojë pranë OST sh.a., një kopje të protokolleve të pranimit (FAT & SAT), transformatorëve të fuqisë, pajisjeve primare dhe sekondare.

5. Pas përfundimit të testimit dhe komisionimit, të parashikuar në pikën 1 të këtij neni, midis përfaqësuesve të OST sh.a.

dhe përfaqësuesve të shoqërisë, do të nënshkruhet protokoll i matjes tregtare, të instaluar në anën ____ kV, të transformatorit ngritës të nënstacionit ____ kV.

6. OST sh.a. do të energjizojë nënstacionin lidhës me rrjetin e transmetimit ____ kV, vetëm pasi të jenë plotësuar detyrimet e parashikuara në këtë marrëveshje, si dhe detyrimet përkatëse të përcaktuara në Marrëveshjen e operimit, për lidhjen në rrjetin e transmetimit sipas projektit të miratuar.

Neni 12

Pajtueshmëria dhe njoftimet operacionale

1. Në përputhje me Kodin e Rrjetit të Transmetimit/Kodin e Lidhjes, rregulloren dhe këtë marrëveshje, sipas grafikut të punimeve pjesë e kësaj marrëveshjeje, Përdoruesi do të paraqesë një raport periodik dhe një certifikatë finale performance të infrastrukturës së tij lidhëse me rrjetin e transmetimit, duke shpjeguar përmbushjen në terma sasiorë dhe cilësorë të kërkesave teknike dhe kriterëve operacionale të specifikuar në Kodin e Rrjetit të Transmetimit, si dhe të kërkesave shtesë të parashikuara me ligj, marrëveshje bilaterale dhe/ose siç kërkohet nga OST sh.a.

2. Procedura operative e njoftimit për lidhjen dhe energjizimin e Përdoruesit do të kryhet në përputhje me dispozitat përkatëse të kodeve të ENTSO-E (*European Network of Transmission System Operators for Electricity*), lidhur me kërkesat për centralet prodhuese dhe konsumatorë të energjisë elektrike dhe detajohet si vijon:

a) Njoftimi Operacional i Energjizimit (EON);

b) Njoftimi Operacional i Ndërmjetëm/i Përkohshëm (ION);

c) Njoftimi Operacional Final (FON); dhe

d) Njoftimi Operacional i Kufizuar (LON).

3. Përdoruesi do të ofrojë asistencën dhe

gjithë informacionin e nevojshëm për OST sh.a., për të mbledhur të dhëna për të verifikuar përmbushjen e kërkesave teknike dhe të performancës.

4. Përdoruesi do të kontrollojë me OST sh.a. çështje relevante në një fazë të hershme të projektit në mënyrë që të mundësohen korrigjimet e nevojshme para verifikimit të pajtueshmërisë së plotë për efekt të komisionimit dhe të energjizimit final të lidhjes.

5. Grupi përkatës i komisionimit, bashkë me procedurën e njoftimeve operacionale, harton edhe lejen teknike, e cila përmban tërësinë e dokumentacionit teknik të përshkruar në Kodin e Rrjetit të Transmetimit/Kodin e Lidhjes.

6. Pas nënshkrimit të kësaj marrëveshjeje, shoqëria duhet të plotësojë të gjitha kërkesat e marrëveshjes se operimit dhe ta nënshkruajë ate perpara venies ne shfrytezim normal.

Neni 13

Planifikimi i ndërprerjeve dhe de-energizimi

1. Bazuar në procedurat e përcaktuara në Kodin e Rrjetit të Transmetimit, OST sh.a. lejohet të kryejë menaxhimin e drejtë të situatave teknike në sistemin elektroenergjetik, duke marrë në konsideratë një gamë të gjerë kushtesh operacionale, në rrethana normale dhe jonormale, në kushtet e tanishme dhe të një sistemi në të ardhmen. Në Kodin e Rrjetit nuk mund të parashikohen dhe adresohen të gjitha mundësitë operacionale, prandaj OST sh.a., në rrethana të paparashikuara në Kodin e Rrjetit, mund të veprojnë vendosmërisht në zbatim të detyrimeve të saj.

2. OST sh.a. dhe Përdoruesi duhet të koordinojnë ndërprerjet e planifikuara në Rrjetin e Transmetimit, në përputhje me Kodin e Rrjetit të Transmetimit, në atë masë që është praktikisht e mundshme dhe e

arsyeshme.

3. OST sh.a. dhe Përdoruesi do të bëjnë përpjekje të arsyeshme për të siguruar që ndërprerjet e tilla do të jenë me kohëzgjatje minimale dhe do të shkaktojnë shqetësime minimale për të tretët dhe nuk do të dëmtojnë funksionimin e sigurt dhe të besueshëm të sistemit.

4. Pavarësisht nga planifikimi vjetor i ndërprerjeve, OST sh.a. do të mund të kryejë ndërprerje të programuara të detyruara dhe de-energizim të pikës së lidhjes së Përdoruesit, kur kjo kërkohet, me qëllim ushtrimin e funksioneve të saj, me kushtin që të njoftojë këtë të fundit 7 (shtatë) ditë kalendarike përpara ditës së ndërprerjeve, për ndryshimin e planit të ndërprerjeve dhe për kryerjen e ndërprerjeve të programuara të detyruara, sipas rastit, ku ky njoftim do të jetë në përputhje me paragrafin 5 më poshtë.

5. Njoftimi i OST sh.a. do të përfshijë:

- a) Njoftimin dhe arsyetimin;
- b) Planin e ndërprerjeve të përditësuar;
- c) Ndërprerjen e programuar të detyruar, duke specifikuar numrin e pritshëm të ndërprerjeve, kohëzgjatjen në orë dhe datat për secilën pikë lidhjeje ku kryhet ndërprerja.

6. Nëse Përdoruesi pengon OST sh.a. në kryerjen e ndërprerjeve të programuara të detyruara, bëhet përgjegjës për të gjitha pasojat dhe kostot që lidhen me vonesat dhe që mund t'i shkaktohen OST sh.a. apo të tretëve me të cilët OST sh.a. është në marrëdhënie kontraktuale.

7. OST sh.a. do të ushtrojë të drejtën e de-energizimit të Përdoruesit në çdo kohë dhe në afatet dhe masën që OST sh.a. e vlerëson proporcionale me situatën, në përputhje me Kodin e Rrjetit të Transmetimit ose në ndonjë nga rrethanat e mëposhtme:

a) Në çdo kohë, në rast të Forcës Madhore, kur konsiderohet se rrethanat e kërkojnë një masë të tillë;

b) Për qëllim të realizimit të projekteve për fuqizimin e rrjetit të transmetimit, duke i dhënë njoftim me shkrim Përdoruesit të

paktën 7 (shtatë) ditë kalendarike përpara;

c) Për qëllim të realizimit të lidhjeve të reja të të tretëve në rrjetin e transmetimit, duke i dhënë njoftim me shkrim Përdoruesit të paktën 7 (shtatë) kalendarike ditë përpara;

d) Me qëllim gjetjen dhe eliminimin e një defekti, për mirëmbajtjen, riparimin ose testimin e një pjese të rrjetit, të cilat janë të nevojshme për të siguruar funksionimin normal dhe për të fuqizuar sigurinë operationale të rrjetit, duke i dhënë njoftim me shkrim Përdoruesit brenda një afati që është praktikisht i mundshëm dhe i arsyeshëm për OST-në.

e) Nëse është e nevojshme në një situatë emergjence, në afërsi të rrjetit elektrik ose, në rast nevojë, për të zbutur efektet e çdo rreziku material ose humbje financiare për çdo person apo pronë të lidhur me ose pranë rrjetit;

f) Kur kërkohet nga furnizuesi i Përdoruesit, për mospagesë të furnizimit me energji elektrike. Në një rrethanë të tillë, OST sh.a. mund të kërkojë dëshmi të mospagesës nga Përdoruesi;

g) Kur Përdoruesi nuk përmbush detyrimet në bazë të Kodit të Rrjetit të Transmetimit dhe sipas vlerësimit të OST sh.a kjo ka një efekt material të dëmshëm në rrjet;

h) Në funksion të nenit 7, "Ushtrimi i të drejtave" të Marrëveshjes së Operimit, nga momenti kur ajo të jetë nënshkruar nga dhe e zbatueshme për Palët e kësaj Marrëveshjeje;

i) Nëse marrëveshja mes palëve përfundon

j) Pas njoftimit me shkrim 7 (shtatë) ditë kalendarike përpara nëse nuk ka dakortësi midis palëve për ndryshime të rrjetit të Përdoruesit (shtesë fuqie, rikonfigurim, etj.);

k) Nëse gjatë kryerjes së punimeve ose gjatë operimit të aseteve të lidhjes, bazuar në një opinion të arsyeshëm të secilës dhe çdo pale, kushtet ose mënyra e veprimit të rrjetit të transmetimit ose, në rast se pjesa e linjës ose nënstacioni shfaq një kërcënim të menjëhershëm për plagosje të një personi ose

dëme materiale të Rrjetit të Transmetimit, ose vetë nënstacionit, OST sh.a. mund të urdhërojë, sipas rastit, personelin operativ të nënstacionit të de-energizojë menjëherë pjesën e linjës dhe të nënstacionin ose OST sh.a. mund të de-energizojë pjesë të Rrjetit të Transmetimit, në çdo rast, duke iu përmbajtur Kodit të Rrjetit të Transmetimit, nëse është e nevojshme ose e përshtatshme për të shmangur shfaqjen e këtyre plagosjeve ose dëmeve.

8. Në rastet e de-energizimit të një Përdoruesi, OST sh.a. do të dokumentojë shpenzimet që lidhen me de-energizimin dhe do t'i faturojë Përdoruesit këto shpenzime, kur:

a) De-energizimi është bërë me kërkesën e Përdoruesit;

b) De-energizimi është bërë në kushtet e nenit 18 të Marrëveshjes së Operimit pasi të jetë nënshkruar dhe e zbatueshme për Palët e kësaj Marrëveshjeje dhe Përdoruesi ka qenë shkaktar për nevojën e de-energizimit;

c) Kur de-energizimi është bërë për shkak të shkeljes nga Përdoruesi të Kodit të Rrjetit të Transmetimit apo kësaj Marrëveshjeje të Lidhjes, Marrëveshjes së operimit dhe Marrëveshjes së mirëmbajtjes nëse është e zbatueshme,.

9. Kur de-energizimi kërkohet nga furnizuesi i Përdoruesit, OST sh.a. do t'i faturojë shpenzimet në lidhje me de-energizimin, furnizuesit të Përdoruesit.

10. Pa cenuar detyrimet e tjera të kësaj Marrëveshjeje, OST sh.a. do të rienergizojë sa më parë që të jetë e mundur Përdoruesin kur ka të dhëna që rrethanat që çuan në de-energizim nuk ekzistojnë më apo ka garanci të dokumentuar që rrethanat nuk do të përsëriten;

11. OST sh.a. mund të kërkojë nga Përdoruesi i prekur nga de-energizimi, prova të arsyeshme ose kryerjen e testeve, për të verifikuar që shkaqet e de-energizimit janë adresuar apo nuk ekzistojnë më. Testimet e nevojshme mund të realizohen nga ana e vetë

Përdoruesit, nga të tretë ose të do të lejohet të kryhen nga OST sh.a.

12. Kur verifikimi apo testimet kryhen nga OST sh.a., Përdoruesi do të jetë përgjegjës për mbulimin e kostove përkatëse.

13. Rienergizimi do të kryhet me koordinimin e të dyja palëve, duke garantuar sigurinë e operimit të Rrjetit të Transmetimit dhe duke shmangur efektet shqetësuese për të tretët.

14. Kostot për rienergizimin alokohen në të njëjtën mënyrë si kostot e de-energizimit.

15. Nëse, gjatë Kohëzgjatjes së kësaj Marrëveshjeje, Përdoruesi nuk është në gjendje të livrojë Energjinë e Prodhuar për shkak të një Ngjarjeje të Ndërprerjes, atëherë OST sh.a. do të dëmshpërblejë Përdoruesin, në përputhje me legjislacionin në fuqi.

Neni 14

Të drejtat dhe detyrimet e shoqërisë si Përdorues i lidhjes

1. Pas lidhjes së _____ (*objektit*), në pajtim me dispozitat e Marrëveshjes e operimit dhe të Marrëveshjes së transmetimit (kur është e aplikueshme), shoqëria fiton të drejtën për të injektuar/për të marrë energji elektrike në/nga rrjeti i transmetimit, në përputhje me fuqinë e instaluar të deklaruar dhe në përputhje me:

a) Rregullat teknike për lidhje të përcaktuara nga OST sh.a.;

b) Kushtet teknike dhe ekonomike të aksesit dhe interkoneksionit në rrjet, të përcaktuara nga autoriteti;

c) Rregullat e dispeçerimit të përcaktuara në Kodin e Rrjetit të Transmetimit;

d) Kërkesat e tjera të përcaktuara në lidhjen me rrjetin e transmetimit, të cilat janë të përcaktuara në Kodin e Rrjetit të Transmetimit.

2. Përdoruesi i lidhjes nuk mund të injektojë/të marrë në/nga rrjeti një fuqi më të lartë se ajo e përcaktuar në ofertën e lidhjes.

Neni 15

Transferimi i marrëveshjes

1. Në rast se Përdoruesi do t'ia transferojë këtë marrëveshje të tretëve, duhet të plotësojë më parë këto kushte:

a) Pala e tretë duhet të jetë e pajisur me licencat e nevojshme nga Enti Rregullator i Energjisë;

b) Të dokumentojë shlyerjen e çdo detyrimi ndaj OST sh.a.;

c) Të ketë njoftuar me shkrim OST sh.a., 3 (tre) muaj përpara ekzekutimit të transferimit.

Neni 16

Forca madhore

1. Me përjashtim të rasteve shprehimisht të parashikuara në këtë Marrëveshje, asnjë Palë nuk do të konsiderohet në shkelje të kësaj Marrëveshjeje, në qoftë se provon që moszbatimi i detyrimeve të saj sipas kësaj Marrëveshjeje është i shkaktuar nga një Ngjarje e Forcës Madhore. Ngjarje e Forcës Madhore është një ngjarje ose një akt natyror ose shoqëror që ndodh në vend, si: tërmetet, ciklonet, rrufetë, përmytjet, thatësira e tejzgjatur, prurja me plota të mëdha, shpërthimet vullkanike, zjarret, lufta, konfliktet e armatosura, kryengritjet, aktet terroriste, të cilat pengojnë palët të përmbushin detyrimet e tyre sipas kësaj Marrëveshjeje, si dhe akte ose ngjarje të tjera, të cilat janë jashtë kontrollit të mundshëm të Palëve dhe nuk ndodhin për faj të tyre dhe Palët nuk janë në gjendje t'i eliminojnë ato, edhe pse kanë ushtruar siç duhet aftësitë, përpjekjet dhe kujdesin e tyre.

2. Në qoftë se çdo palë është në pamundësi të përmbushë ndonjë ose të gjitha detyrimet e saj sipas kësaj marrëveshjeje, për shkak të një ngjarje të forcës madhore, kjo marrëveshje do të jetë në fuqi, por:

a) Detyrimet përkatëse të palës mospërmbushëse do të pezullohen për një

periudhë të barabartë me ngjarjen ose rrethanën e forcës madhore.

b) Detyrimet e Palës tjetër që i detyrohet palës mospërmbushëse sipas kësaj marrëveshjeje, të cilat pala tjetër është e pamundur t'i përmbushë drejtpërdrejt, si rezultat i pezullimit të detyrimeve të palës mospërmbushëse, do të pezullohen për një periudhë të barabartë me ngjarjen ose rrethanat e forcës madhore, duke pranuar që:

i) Pezullimi i përmbushjes është i një qëllimi jo më të madh dhe i një kohëzgjatjeje jo më të madhe se sa kërkohet për forcën madhore;

ii) Asnjë detyrim i secilës palë, i lindur përpara forcës madhore, duke shkaktuar pezullimin e përmbushjes, nuk do të anashkalohej si rezultat i forcës madhore;

iii) Pala në mospërmbushje njofton menjëherë palën tjetër për ngjarjen ose rrethanën e forcës madhore, duke përfshirë natyrën dhe kohëzgjatjen e pritshme, si dhe vazhdon t'i raportojë rregullisht në lidhje me to gjatë periudhës së forcës madhore;

iv) Pala mospërmbushëse përdor të gjitha mundësitë e arsyeshme për të parandaluar, për të shmangur ose për të zbutur pasojat e forcës;

v) Menjëherë pas shfaqjes së ngjarjes ose rrethanave të forcës madhore, Palët do të diskutojnë për të vazhduar veprimet e tyre, sa më mirë dhe sa më gjatë të jetë e mundur, në përputhje me këtë marrëveshje dhe Kodin e Rrjetit të Transmetimit.

Neni 17

Rastet e mospërmbushjes

1. Nëse konstatohet se Përdoruesi është në shkelje/mospërmbushje të ndonjë prej dispozitave të marrëveshjes, Kodit të Rrjetit

të Transmetimit apo kuadrit ligjor, atëherë OST sh.a., në përputhje me kompetencat e saj, sa më shpejt që është e mundur, do të njoftojë Përdoruesin duke udhëzuar atë për eliminimin e tyre dhe duke përcaktuar afatet përkatëse për këtë qëllim.

2. Në vijim të njoftimit nga OST sh.a. dhe të zbatimit të udhëzimeve për eliminimin e shkeljes/e mospërbushjes nga ana e Përdoruesit, Përdoruesi do të njoftojë OST sh.a., brenda afatit të caktuar në udhëzimet e dhëna prej saj ose brenda 5 (pese) ditëve pune, nëse OST sh.a. nuk ka specifikuar afat tjetër më të gjatë, për hapat e ndërmarrë për eliminimin e shkeljes ose eliminimin përfundimtar të saj ose paaftësinë për të eliminuar shkeljen.

3. Nëse Përdoruesi nuk vepron në përputhje me udhëzimin e OST sh.a., standardet e sigurisë, Kodin e Rrjetit të Transmetimit dhe Marrëveshjen e lidhjes dhe operimit, OST sh.a. do të japë një njoftim të dytë paralajmërues me shkrim dhe do të procedojë me de-energizimin, pas kalimit të së paku 7 (shtatë) ditëve nga ky njoftim, me kusht që në kohën e skadimit të njoftimit, Përdoruesi ende nuk ka vepruar në përputhje me udhëzimet e OST sh.a..

4. Përjashtimisht nga sa parashikohet më lart, kur Përdoruesi nuk përmbush detyrimet e tij sipas kushteve të kësaj Marrëveshjeje dhe OST sh.a. e vlerëson të nevojshme ushtrimin emergjent të funksioneve të saj, ka të drejtë të de-energizojë menjëherë nënstacionin dhe të njoftojë me shkrim Përdoruesin për shkaqet e këtij de-energizimi. Përdoruesi, në këtë rast do të përgjigjet për dëmet e shkaktuara OST sh.a. dhe do të marrë masat për korrigjimin e situatës dhe/ose përmbushjen e detyrimeve të saj, sa më shpejt të jetë e mundur. De-energizimi do të vazhdojë deri sa Përdoruesi të korrigjojë situatën dhe/ose të përmbushë detyrimet e tij.

Neni 18

Zgjidhja e Marrëveshjes

1. OST sh.a. ka të drejtë, në çdo kohë të zgjidhë Marrëveshjen, nëse verifikohet çdonjëra nga sjelljet e mëposhtme:

a) Shoqëria nuk respekton përcaktimet e bëra në këtë marrëveshje, në ofertën e lidhjes dhe projektzbatimin përfundimtar të pranuar nga OST sh.a.;

b) Pezullimi i një ose më shumë lejeve për qasje dhe lidhjen me rrjetin e transmetimit;

c) Dështimi për të ndjekur kushtet teknike dhe ekonomike të lidhjes me rrjetin e transmetimit dhe interkoneksionit;

d) Dështimi për të përmbushur detyrimet për informim të OST sh.a.;

e) Çdo sjellje tjetër që mund të rrezikojë sigurinë dhe vazhdimësinë e shërbimit të operimit të rrjetit elektrik ose është në mënyrë të qartë në kundërshtim me dispozitat e Kodit të Rrjetit.

2. Në raste të tilla, shkëputja fizike do të bëhet pas përfundimit të procesit të zgjidhjes së mosmarrëveshjeve sipas nenit të sipërpërmendur.

3. Shoqëria në këtë rast do të përgjigjet për dëmet e shkaktuara OST sh.a.

Neni 19

Konfidencialiteti

1. Secila nga Palët merr përsipër që të ruajë sekret përmbajtjen e kësaj marrëveshjeje dhe kushtet e saj, si dhe çdo informacion dhe dokument që palët kanë shkëmbyer ose kanë marrë dijeni gjatë negociemeve të kësaj marrëveshjeje, me përjashtim të rasteve kur bërja publike e sa më sipër është kërkesë e ligjeve shqiptare ose institucioneve të financimit të Përdoruesit (nëse ka) (përfshirë filialet, punonjësit, këshilltarët e tyre dhe palët e tjera të lidhura), me kusht që këto institucione të financimit të respektojnë detyrimet e konfidencialitetit.

2. Detyrimi për të ruajtur sekret informacionet e marra si më sipër për secilën

nga palët në këtë marrëveshje vazhdon edhe pas zgjidhjes së saj.

Neni 20 Njoftimet

1. Përveç sa është parashikuar ndryshe në nenet e tjera të kësaj marrëveshjeje, çdo komunikim sipas saj do të bëhet me shkrim dhe do të njoftohet me letër rekomande (njoftim marrjeje), në adresat e përcaktuara më poshtë:

Për OST sh.a., në:

Adresa: OST sh.a.

Adresa postare: Autostrada Tiranë–Durrës, km 9, Yrshek, Kashar, Tiranë, Shqipëri

Numri i telefonit: +355 4 2225581

Adresa e postës elektronike: info@ost.al

Në vëmendje të: Administratorit të OST sh.a.

Për Përdoruesin, në:

Adresa:

Adresa postare:

Numri i telefonit:

Adresa e postës elektronike:

Në vëmendje të: Përfaqësuesit ligjor të Përdoruesit

ose në adresën që u komunikohet palëve sipas mënyrës së përcaktuar më sipër.

2. Çdo komunikim i drejtuar në adresat e mësipërme dhe i kryer sipas mënyrës sa më sipër përcaktuar është i vlefshëm dhe i detyrueshëm për palët. Komunikimet konsiderohen të kryera në mënyrë të vlefshme në momentin e marrjes së letrës rekomande nga marrësi, sipas mënyrës së përcaktuar më sipër.

Neni 21 Ndryshimet

1. Çdo ndryshim i mundshëm i ndonjë kushti të kësaj marrëveshjeje ose të një të drejte që rrjedh nga kjo marrëveshje, do të jetë i vlefshëm nëse do të bëhet me shkrim

dhe do të nënshkruhet nga palët ose nëse ndryshimet e propozuara miratohen nga ERE.

2. Secila nga palët ka të drejtë të njoftojë palën tjetër për t'i rekomanduar këto ndryshime në marrëveshje, herë pas here, pasi janë të nevojshme për të siguruar pajtueshmërinë me kërkesat e Kodit të Rrjetit të Transmetimit, licencave përkatëse që ato kanë, si dhe akteve të tjera relevante.

Neni 22 Ndashmëria

1. Çdo nen, dispozitë, seksion, paragraf apo nënndarje e kësaj marrëveshjeje që është ose do të shpallet i pavlefshëm ose i paefektshme, do të hiqet nga kjo marrëveshje, nuk do të zbatohet dhe nuk do të ndikojë, në asnjë mënyrë, në vlefshmërinë e dispozitave të tjera të kësaj marrëveshjeje, për aq sa lejohet nga dispozitat ligjore.

Neni 23 Ligji i zbatueshëm dhe zgjidhja e mosmarrëveshjeve

1. Kjo marrëveshje do të rregullohet nga dhe interpretohet në përputhje me ligjet e Republikës së Shqipërisë.

2. Të gjitha mosmarrëveshjet që do të lindin si pasojë e interpretimit dhe e zbatimit të kësaj marrëveshjeje, kur kanë të bëjnë me interpretimin e dispozitave të Kodit të Rrjetit të Transmetimit, do të zgjidhen në përputhje me procedurat e parashikuara në të. Në çdo rast tjetër, palët do të mundohen t'i zgjidhin mosmarrëveshjet me mirëkuptim midis tyre.

3. Në rast se palët nuk kanë zgjidhur me mirëkuptim mosmarrëveshjen brenda 30 (tridhjetë) ditëve kalendarike, secila nga Palët mund ta paraqesë këtë Mosmarrëveshje për zgjidhje në ERE.

4. Në rast se mosmarrëveshja nuk është zgjidhur nga ERE, secila nga Palët ka të drejtë t'i drejtohet Gjykatës së Rrethit

Gjyqësor Tiranë.

Neni 24
Gjuha

1. Me përjashtim të rasteve kur parashikohet ndryshe në këtë marrëveshje, të gjitha njoftimet, ose dokumente të tjera që njëra nga palët i jep palës tjetër sipas kësaj marrëveshjeje, do të jenë në gjuhën shqipe.

2. Kjo marrëveshje është hartuar në 4 (katër) kopje, në gjuhën shqipe, ku tri kopje i mban OST sh.a. dhe një kopje Përdoruesi.

OST sh.a.

Nga: Z. _____

Titulli: Administrator i OST sh.a.

Përdoruesi

Nga: Z. _____

Titulli: Përfaqësues ligjor i Përdoruesit

Aneksi nr. 1. Dokumentacioni teknik i lidhjes me rrjetin kombëtar të transmetimit

Aneksi nr. 2. Licenca për prodhimin e energjisë elektrike, e lëshuar nga ERE ose Aplikimi pranë ERE për t'u pajisur me licencë për prodhimin e energjisë elektrike.

Aneksi nr. 3. Specifikimet teknike të sistemit të matjes tregtare

Aneksi nr. 4. Specifikimet teknike të lidhjes me sistemin e telekomunikacionit

Aneksi nr. 5. Specifikimet teknike të lidhjes me sistemin SCADA të Qendrës Kombëtare Dispeçer

Aneksi nr. 6. Deklaratat e përgjegjësisë dhe gatishmërisë

Aneksi nr. 7. Pjesët e aseteve të lidhjes që do të dorëzohen